

UCAPAN PERDANA MENTERI DI UPACARA
PERBARISAN PASUKAN PALANG MERAH DI
PADANG KELAB SELANGOR, KUALA LUMPUR
PADA 7^{HB} MEI, 1972

Tuan Pengerusi¹ Persatuan Palang Merah Malaysia, Saudara-saudara Anggota Pasukan Palang Merah sekalian.

Pada hari yang bersempena auspicious dan berbahagia ini, iaitu Hari Palang Merah Sedunia, saya turut bergembira dengan saudara-saudara sekalian merayakan hari ini. Sebagai Presiden Persatuan Palang Merah Malaysia, saya sungguh berbangga dengan kecekapan dan kecergasan yang dibuktikan pada perbarisan di hadapan kita ini.

Saudara-saudara,

Persatuan Palang Merah Malaysia dikenal umum sebagai satu-satunya pertubuhan sukarela yang aktif di negara kita. Pada saat-saat negara kita menghadapi kecemasan, khususnya semasa peristiwa banjir, Pasukan Palang Merah berada di barisan hadapan bersama-sama menjalankan tugas peri kemanusiaan. Begitu pula di masa-masa kecemasan lain yang berlaku dari semasa ke semasa ambulan Palang Merah memainkan peranan penting sebagai tambahan pada perkhidmatan kesihatan negara.

Bagi pihak Kerajaan, saya ingin menyatakan penghargaan negara kepada segala khidmat bakti yang saudara-saudara berikan itu.

Bagaimana pun, saya rasa peranan Palang Merah tidaklah seharusnya menunggu masa-masa kecemasan sahaja. Kita sepatutnya mempunyai rancangan jangka panjang untuk memenuhi keperluan masyarakat. Hari ini kita harus mengakui peranan yang dijalankan oleh Palang Merah hanya diketahui oleh sebahagian masyarakat saja.

Sudah perkara tentu, untuk meluaskan scope kegiatannya, Persatuan Palang Merah menghendaki bantuan kewangan yang lebih

¹ Tan Sri A. J. Woods.

banyak. Tetapi dalam hal ini saya percaya sokongan dari masyarakat ramai boleh didapati. Dengan sebab itu orang ramai mustahak diberi penerangan supaya mereka turut berbangga dengan Persatuan Palang Merah Kebangsaan yang akan berkhidmat untuk kepentingan dan kesejahteraan rakyat.

Oleh yang demikian, Persatuan Palang Merah menghadapi cabaran-cabaran yang besar pada masa depan. Kita tidak seharusnya berpuas hati dengan kerja-kerja kebajikan yang biasa dan hendaklah meluaskan scope tugas supaya Palang Merah benar-benar memberikan khidmat yang bermakna.

Saudara-saudara,

Tahun ini tema Hari Palang Merah ialah "Jambatan Peri Kemanusiaan" atau Humanity Bridge. Cita-cita yang ada dalam kata-kata ini hendaklah dijadikan satu kenyataan. Saya percaya saudara-saudara sekalian memahami penuh maksud kata-kata ini iaitu, sebagai anggota Palang Merah, kita merupakan jambatan yang menghubungkan dua pihak atau golongan-golongan yang menderita dan memerlukan pertolongan dengan golongan yang ingin menghulurkan pertolongan itu. Peranan ini boleh dijayakan oleh kerana sifat pertubuhan kita yang benar-benar bercorak kebangsaan, yang dianggotai oleh rakyat berbilang bangsa, ugama dan kebudayaan, mengatasi garis politik dan kelompok sosial, tetapi semata-mata didorongi oleh prinsip-prinsip peri kemanusiaan timbang rasa dan universaliti.

Saya percaya dengan adanya satu rancangan yang bersifat Nasional, Persatuan Palang Merah akan memberikan kesan yang lebih besar kepada masyarakat terutama dalam usaha membasmi penderitaan rakyat. Untuk menjayakan ini, mustahaklah saudara-saudara bersama menyertai kehidupan masyarakat negara kita terutama masyarakat luar bandar yang lebih memerlukan perkhidmatan. Satu rancangan bimbingan atau didikan mengelakkan kemalangan, pertolongan cemas dan lain-lain lagi yang mustahak diketahui oleh orang awam perlu dilaksanakan. Usaha ini bolehlah dijalankan secara sendiri atau pun dengan kerjasama badan-badan yang sedia ada di tempat-tempat itu umpamanya kelab-kelab belia, Perkumpulan Perempuan atau pun St. John. Yang penting diingat ialah supaya perkhidmatan Palang Merah benar-benar dilihat dan dinikmati oleh semua lapisan rakyat dan tidak hanya ditumpukan kepada penduduk-penduduk bandar sahaja.

Saudara-saudara,

Saya suka juga menyebutkan di sini iaitu melalui Persatuan Palang Merah, nama negara kita bertambah harum dan dipandang tinggi oleh dunia internasional. Awal tahun ini, semasa pergolakan di Bangladesh, Persatuan Palang Merah Malaysia telah diminta oleh International Red Cross menghantarkan program bantuan di sana. Hal ini tentulah menjadi kebanggaan kepada kita khususnya dan kepada negara amnya.

Bagaimana pun, saya rasa masih banyak yang dapat diusahakan oleh Persatuan Palang Merah untuk kebajikan rakyat. Langkah membuka sebuah Tadika atau Kindergarten untuk kanak-kanak dari keluarga yang kurang mampu adalah satu cara yang patut dipuji. Memandang pada semakin ramainya penduduk-penduduk kita yang tinggal di rumah-rumah pangsa, saya fikir usaha ini dapat diperluaskan supaya memberi munafaat kepada golongan kurang mampu itu.

Begitu juga, perhatian yang lebih berat hendaklah ditujukan kepada belia-belia kita. Kebanyakan belia-belia kita hari ini adalah lebih berpelajaran dan melalui latihan dan disiplin dalam Persatuan Palang Merah, mereka dapat memberi sumbangan besar kepada masyarakat. Oleh itu kesempatan yang lebih luas patutlah diberi kepada belia-belia kita supaya mereka dapat bersama-sama merancang serta membuat keputusan dalam hal-hal yang berkaitan dengan gerakan Palang Merah ini. Dengan memberikan mereka peranan yang bertanggungjawab, saya percaya belia-belia boleh menjadi jambatan penghubung antara jenerasi dan beserta mencari huraian terhadap masalah rosak akhlak atau juvenile delinquency, drug-addiction dan sebagainya.

Dalam hal ini saya memuji langkah bersama di Selangor dan Pulau Pinang antara Palang Merah dan Kementerian Pelajaran melatih guru-guru supaya mengelolakan Unit Palang Merah di sekolah-sekolah. Langkah ini juga patut diluaskan ke negeri-negeri lain.

Saudara-saudara,

Akhir kata, saya meminta saudara-saudara meninjau kembali peranan Palang Merah dan memikirkan bagaimana pertubuhan ini boleh memainkan peranannya yang lebih dinamis di masa

depan. Sebagaimana yang kita maklum, Kerajaan lebih ingin melihat semangat berdikari atau self-reliance menjadi pegangan dan amalan seluruh masyarakat. Pertubuhan ini boleh menjadi agent yang cergas di dalam usaha menyebarkan semangat ini, terutama di lapangan pembangunan masyarakat dan dengan itu memberikan bantuan positif kepada Kerajaan untuk mencapai cita-cita mendirikan satu bangsa yang bersatu dalam negara aman damai, makmor dan bahagia.